



REPUBLIKA E SHQIPËRISË
KËSHILLI I EMËRIMEVE NË DREJTËSI

VENDIM

Nr. 19, datë 17.07.2020

PËR NDALIMIN E KANDIDIMIT TË ZOTIT VASIL BENDO NË VENDIN VAKANT PËR GJYQTAR NË GJYKATËN KUSHTETUESE, SHPALLUR NGA PRESIDENTI I REPUBLIKËS NË DATËN 07.02.2018 DHE RISHPALLUR NË DATËN 27.09.2019

Këshilli i Emërimeve në Drejtësi, i përbërë nga :

Vitore Tusha	- Zëvendëskryetare
Fiona Papajorgji	- Anëtare
Arta Marku	- Anëtare/Relatore
Miranda Andoni	- Anëtare
Saida Dollani	- Anëtare
Ludovik Dodaj	- Anëtar
Fatjona Memçaj	- Anëtare
Arjan Qafa	- Anëtar

Asistuar nga sekretare **Dorina Dulaj,**

Me praninë e Avokates së Popullit, **znj. Erinda Ballanca,** në cilësinë vëzhguesit të përhershëm të mbledhjeve dhe veprimtarisë së Këshillit të Emërimeve në Drejtësi,

Me praninë e përfaqësuesve të autorizuar të subjekteve të ftuara sipas ligjit për pjesëmarrje, në cilësinë e vëzhguesve, në mbledhjen e Këshillit:

- **z. Bledar Dervishaj,** përfaqësues i autorizuar i Presidentit të Republikës,

- **znj. Katrin Treska,** përfaqësuese e autorizuar e Presidentit të Republikës,

- **në mungesë të përfaqësuesve të tjerë** të subjekteve të ftuara sipas ligjit për pjesëmarrje,

në mbledhjen e datës 17.07.2020, mori në shqyrtim çështjen që i përket:

KANDIDADI PËR GJYQTAR

NË GJYKATËN KUSHTETUESE:

z. Vasil Bendo

OBJEKTI:

Urdhërimi i ndalimit të kandidimit të z. Vasil Bendo, në vendin vakant për gjyqtar në Gjykatën Kushtetuese, të shpallur nga Presidenti i Republikës në datën 07.02.2018 dhe rishpallur në datën 27.09.2019.

KËSHILLI I EMËRIMEVE NË DREJTËSI

Pasi dëgjoi relatimin e anëtares së Këshillit, **Arta Marku**, mendimin e paraqitur nga Avokati i Popullit, znj. Erinda Ballanca, në cilësinë e vëzhgueses së përhershme në mbledhjet dhe veprimtarinë e Këshillit të Emërimeve në Drejtësi, lidhur me mënyrën e procedimit të ndjekur për verifikimin e kandidatit, dhe si e bisedoi çështjen në tërësi,

VËREN:

I. Rrethanat e çështjes

1. Në zbatim të nenit 125 të Kushtetutës dhe të pikës 1 të nenit 7/b të ligjit nr. 8577, datë 10.02.2000 "*Për organizimin dhe funksionimin e Gjykatës Kushtetuese të Republikës së Shqipërisë*", të ndryshuar (në vijim ligji nr. 8577/2000), Presidenti i Republikës, në datën 07.02.2018, ka shpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese për shkak të mbarimit përpara afatit ligjor të mandatit të gjyqtarit Besnik Imeraj.

2. Këshilli i Emërimeve në Drejtësi, në përfundim të procedurës së verifikimit dhe të vlerësimit, për vakancën e shpallur nga Presidenti i Republikës, në datën 07.02.2018, me vendimin nr. 137, datë 21.09.2019, vendosi:

- Pezullimin e procedurës së verifikimit të kandidaturave dhe njoftimin e subjektit që e ka vënë në lëvizje, Presidentin e Republikës, për të vlerësuar rishpalljen e thirrjes për paraqitjen e kandidaturave për plotësimin e vendit vakant në Gjykatën Kushtetuese, vakancë e parakohshme, të shpallur me dekretin nr. 10723 datë 07.02.2018 nga Presidenti i Republikës.

3. Në zbatim të vendimit nr. 137, datë 21.09.2019 të Këshillit të Emërimeve në Drejtësi dhe të nenit 125 të Kushtetutës dhe të pikës 1 të nenit 7/b të ligjit nr. 8577/2000, Presidenti i Republikës, në datën 27.09.2019, ka rishpallur hapjen e procedurës së aplikimeve për plotësimin e vendit vakant, vakancë e parakohshme, të krijuar në Gjykatën Kushtetuese për shkak të mbarimit përpara afatit ligjor të mandatit të gjyqtarit Besnik Imeraj.

4. Në përfundim të procedurës së aplikimeve për shprehjen e interesit për kandidim, Presidenti i Republikës i ka dërguar Këshillit të Emërimeve në Drejtësi aplikimet e kandidatëve të shoqëruara me dokumentet e paraqitura prej tyre për përmbushjen e kushteve dhe kritereve ligjore të përcaktuara në nenin 7/a të ligjit nr. 8577/2000.

5. Në vijim, Këshilli i Emërimeve në Drejtësi, me vendimin nr.138 datë 22.10.2019, vendosi:

Revokimin e vendimit nr. 137 datë 21.09.2019 "Për pezullimin e procedurës së verifikimit të kandidaturave dhe njoftimin e subjektit që e ka vënë në lëvizje, Presidentin e Republikës së Shqipërisë, për të vlerësuar rishpalljen e thirrjes për paraqitjen e kandidaturave për plotësimin e vendit vakant në Gjykatën Kushtetuese, vakancë e parakohshme, të shpallur me Dekretin nr. 10723 datë 07.02.2018 nga Presidenti i Republikës".

Vijimin e procedurave të verifikimit dhe të vlerësimit, të kandidaturave për plotësimin e vendit vakant në Gjykatën Kushtetuese, vakancë e parakohshme, të rishpallur me Dekretin nr.11291 datë 27.09.2019 nga Presidenti i Republikës së Shqipërisë.

6. Sipas rezultatit të shortit manual të realizuar në datën 05.04.2019, nga ana e Këshillit të Emërimeve në Drejtësi në zbatim të nenit 228 të ligjit nr. 115/2016 “Për organet e qeverisjes së sistemit të drejtësisë” (në vijim ligji nr. 115/2016) dhe të pikave 5, 27 deri 37 dhe 41 të Vendimit të Këshillit të Emërimeve në Drejtësi nr. 2, datë 15.02.2019 “Për procedurën e shortit të caktimit të relatorëve për pozicionet vakante në çdo institucion”, si edhe të pikës 4 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtari i Këshillit, z. Eriol Roshi. Për shkak të përfundimit të mandatit të Këshillit të Emërimeve në Drejtësi (i përkohshëm) 2019, zhvillimi i procedurave të verifikimit për këtë pozicion vakant i kaloi Këshillit të Emërimeve në Drejtësi 2020, i cili në datën 15.01.2020 zhvilloi shortin manual dhe relator për ndjekjen e procedurave të verifikimit, vlerësimit, pikëzimit dhe renditjes së kandidaturave, është caktuar anëtarja e Këshillit Arta Marku. Sipas parashikimit të pikës 5/2, shkronja “b”, të vendimit nr. 4, datë 11.3.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, të ndryshuar, të Këshillit të Emërimeve në Drejtësi, relatorja kontrolloi saktësinë dhe plotësinë e veprimeve të kryera dhe konfirmoi veprimet e kryera nga relatorët e mëparshëm.

7. z. Vasil Bendo, si njëri ndër kandidatët që ka shprehur interesin për vendin vakant të sipërcituar në Gjykatën Kushtetuese, në zbatim të pikës 22 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, është njoftuar me shkrim për t’u paraqitur pranë Këshillit për të vijuar me përmbushjen e procedurave të verifikimit të kandidaturës. Njoftimi me shkrim, i kryer në rrugë elektronike në adresën e deklaruar nga vetë kandidati Vasil Bendo, gjendet i administruar në dosjen e kandidimit.

8. Në datën 25.10.2019, kandidati Vasil Bendo është paraqitur pranë Këshillit të Emërimeve në Drejtësi dhe është pajisur me formularët e deklarimit dhe autorizimet që duhet të plotësohen për qëllimet e vijimit të procedurës së verifikimit të kandidaturës së tij. Kryerja e kësaj procedure vërtetohet nga nënshkrimi prej vetë kandidatit në deklaratën përkatëse, e cila gjendet e administruar në dosjen e kandidimit.

9. Në datën 29.10.2019, kandidati Vasil Bendo ka depozituar në sekretarinë e Këshillit të Emërimeve në Drejtësi formularët e deklarimit dhe autorizimet përkatëse për qëllimet e vijimit të procedurës së verifikimit të kandidaturës së tij, të cilat gjenden të administruara në dosjen e kandidimit.

10. Për verifikimin e kushteve dhe kriterëve ligjore të kandidimit, lidhur me verifikimin dhe kontrollin e pasurisë, në zbatim të shkronjës “dh” të nenit 7/a të ligjit nr. 8577/2000, të nenit 235 të ligjit nr. 115/2016, si edhe në zbatim të pikës 60 të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, me shkresën nr.703 prot., datë 30.10.2019, Këshilli i ka dërguar ILDKPKI-së listën e kandidatëve dhe personave të

lidhur me ta që i nënshtrohen procedurës së verifikimit të kushteve dhe kriterëve të tjera ligjore të kandidimit sipas ligjit nr. 8577/2000 dhe ligjit nr.115/2016.

11. Bashkëlidhur kësaj shkrese drejtuar ILDKPKI-së, ndërmjet të tjerave, është vendosur edhe Deklarata e nënshkruar nga kandidati Vasil Bendo, ku tregohet se është pajisur me formularët e deklarimit dhe autorizimet që duhet të plotësohen për qëllimet e procedurës së verifikimit të kandidaturës së tij, si edhe data e nënshkrimit, nga e cila fillojnë të llogariten afatet e përcaktuara nga ligji për përmbushjen e detyrimeve ligjore të kandidatit për procedurën e verifikimit të kandidaturës.

12. ILDKPKI-ja, në zbatim të nenit 235 të ligjit nr.115/2016, të ligjit nr. 9049, datë 10.04.2003 “Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë” (në vijim ligji nr. 9049/2003) dhe ligjit nr. 9367, datë 07.04.2005 “Për parandalimin e konfliktit të interesave në ushtrimin e funksioneve publike” (në vijim ligji nr. 9367/2005), me shkresën nr.125/25 prot., datë 06.12.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Vasil Bendo dhe personat e lidhur me të.

13. Gjithashtu, në funksion të ushtrimit të kompetencave të tij për verifikimin e plotësimit të kushteve dhe kriterëve ligjore të kandidimit, për sa i përket kontrollit të pasurisë, në zbatim të pikës 4 të nenit 229 dhe 235 të ligjit nr. 115/2016, të shkronjës “e” të pikës 20, 24, shkronjës “b” të pikës 60 e vijues të Vendimit të Këshillit të Emërimeve në Drejtësi nr. 4, datë 11.03.2019 “Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”, edhe ky Këshill ka kryer veprimet verifikuese të kërkimit nga subjekte publike dhe private, të të dhënave mbi pasuritë, interesat private dhe detyrimet financiare që ekzistojnë në emër dhe për llogari të kandidatit Vasil Bendo dhe personave të lidhur me të.

14. Për realizimin e veprimeve verifikuese të lidhura me kontrollin e pasurisë së kandidatit Vasil Bendo, Këshilli i Emërimeve në Drejtësi, në datën 14.11.2019, i është drejtuar me kërkesa për informacion dhe ka marrë përgjigjet përkatëse me të dhënat e kërkuara nga secili prej institucioneve publike dhe subjekteve private (të cilat janë administruar në dosjen e kandidimit), si vijon:

- a) Institucioneve bankare: (1) Banka Alpha Albania, (2) Banka Amerikane e Investimeve, (3) Banka Credins, (4) Banka e Bashkuar e Shqipërisë, (5) Banka e Parë e Investimeve, (6) Banka Intesa Sanpaolo, (7) Banka Kombëtare Tregtare, (8) Banka Procredit, (9) Banka Raiffeisen, (10) Banka Societe Generale, (11) Banka Tirana dhe (12) Banka Union.
- b) Institucione financiare të licencuara nga Banka e Shqipërisë : (1) Ak-Invest, (2) Albania Leasing, (3) Capital Invest, (4) Easy pay sh.p.k, (5) Final sha, (6) Fondi Besa, (7) Iutecredit Albania, (8) Landeslease, (9) M – Pay sh.p.k. (10) NOA sha, (11) Porsche Leasing, (12) Posta Shqiptare, (13) Raiffeisen Leasing, (14) Tirana Factoring & Lease, (15) Tranzit sha, (16) Union Financiar Tiranë.
- c) Subjekte financiare të licencuar nga AMF : (1) Fondi i Pensionit Vullnetar Credins Pension, (2) Fondi i Investimit Credins Premium, (3) Fondi i Investimit Raiffeisen Invest Euro, (4) Fondi i Investimit Raiffeisen Prestigj, (5) Fondi i Investimit Raiffeisen Vision, (6) Fondi i Investimit WVP Top Invest, (7) Fondi i Pensionit Vullnetar Raiffeisen, (8) Fondi i Pensionit Vullnetar Sigal.

ç) Institucione të tjera publike si : (1) Agjencia Shtetërore e Kadastrës, (2) DPSHTRR, (3) D.P.Tatimeve, (4) M.Drejtësisë, (5) OSHEE, (6) QKB, (7) UKT.

15. Në përgjigje të kërkesave për informacion të Këshillit të Emërimeve në Drejtësi, të gjitha institucionet publike dhe subjektet private të treguara në pikën 14 më sipër, me përjashtim të Banka Alpha Albania, kanë dërguar pranë Këshillit përgjigjet përkatëse ku përmbahen të gjitha të dhënat e kërkuara mbi pasuritë e kandidatëve, nëse kanë pasur të tilla për secilin prej tyre, përfshirë edhe kandidatin Vasil Bendo.

16. Për verifikimin e kushteve dhe kritereve ligjore të kandidimit, lidhur me verifikimin dhe kontrollin e integritetit, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikës 82 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr.726 prot., datë 14.11.2019, Këshilli ka dërguar në Prokurorinë e Përgjithshme për kompetencë formularin e vetëdeklarimit të plotësuar nga kandidati Vasil Bendo sipas ligjit nr. 138/2015 “Për garantimin e integritetit të personave që zgjidhen, emërohen ose ushtrojnë funksione publike” (në vijim ligji nr. 138/2015).

17. Prokuroria e Përgjithshme, me shkresën nr. 3078/75 prot., datë 20.01.2020, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Vasil Bendo.

18. Për verifikimin e kushteve dhe kritereve ligjore të kandidimit, lidhur me verifikimin dhe kontrollin e integritetit të kandidatis Vasil Bendo, në zbatim të shkronjës “ç” të nenit 7/a të ligjit nr. 8577/2000, të nenit 236 të ligjit nr. 115/2016, si edhe në zbatim të pikës 84 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli i është drejtuar me kërkesë për ndihmë administrative për përpunimin e informacionit të klasifikuar për qëllimet e verifikimit të integritetit të kandidatëve Drejtorisë së Sigurisë së Informacionit të Klasifikuar (shkresa nr.725 prot., datë 14.11.2019) dhe me kërkesë për informacion Shërbimit për Çështjet e Brendshme dhe Ankesat pranë Ministrisë së Brendshme (shkresa nr.727 prot., datë 14.11.2019).

19. Drejtoria e Sigurisë së Informacionit të Klasifikuar dhe Shërbimi për Çështjet e Brendshme dhe Ankesat pranë Ministrisë së Brendshme kanë dërguar përgjigjet e tyre, përkatësisht me shkresat nr. 4021 prot., datë 18.12.2019 dhe nr. 2419/2, datë 03.12.2019.

20. Gjithashtu, lidhur me verifikimin dhe kontrollin e integritetit, në zbatim të nenit 229 dhe 236 të ligjit nr. 115/2016, të dispozitave të ligjit nr. 45/2015 “Për të drejtën e informimit për dokumentet e Ish-Sigurimit të Shtetit të Republikës Popullore Socialiste të Shqipërisë” (në vijim ligji nr. 45/2015), si edhe në zbatim të pikës 85 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, me shkresën nr. 724 prot., datë 14.11.2019, Këshilli ka dërguar formularin e aplikimit përkatës të plotësuar sipas ligjit nga kandidati Vasil Bendo për kompetencë dhe shqyrtim Autoritetit për Informimin mbi Dokumentet e Ish-Sigurimit të Shtetit.

21. Autoriteti për Informimin mbi Dokumentet e Ish-Sigurimit të Shtetit, me shkresën nr. 1599/4 prot., datë 04.12.2019, ka dërguar vendimin nr. 764, datë 02.12.2019 pranë Këshillit të Emërimeve në Drejtësi me rezultatet e kontrollit të ushtruar për kandidatin Vasil Bendo.

22. Për verifikimin e kushteve dhe kriterëve ligjore të kandidimit, në zbatim të shkronjave “b”, “c” dhe “d” të pikës 1, pikës 2 dhe 3 të nenit 7/a të ligjit nr. 8577/2000, të nenit 237 dhe 240 të ligjit nr. 115/2016, si edhe në zbatim të pikave 91 e 93 të Vendimit të Këshillit të Emërimeve në Drejtësi nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, Këshilli ka shqyrtuar dokumentacionin përkatës të depozituar nga vetë kandidati Vasil Bendo në momentin e kandidimit pranë organit të emërtesës që ka shpallur vendin vakant.

23. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja “c” e pikës 1 të nenit 7/a të ligjit nr. 8577/2000, pra që kandidati *të mos ketë mbajtur pozicione drejtuese në parti politike gjatë 10 viteve të fundit nga data e kandidimit*, Këshilli në datën 14.11.2019 i është drejtuar më kërkesë për informacion partive politike, duke i bashkëlidhur listat e të gjithë kandidatëve për gjyqtar në Gjykatën Kushtetuese. Në përgjigje të këtyre kërkesave, partitë politike kanë dërguar informacione lidhur me ekzistencën ose jo të të dhënave që do të vërtetonin angazhimin në ndonjë pozicion drejtues në parti politike të secilit prej kandidatëve, përfshirë edhe kandidatin Vasil Bendo.

24. Këshilli, në datën 10.12.2019 dhe në datën 24.12.2019, në rrugë elektronike i ka kërkuar kandidatin të paraqesë shpjegime me shkrim dhe dokumente shtesë në zbatim të nenit 229 pika 2 dhe 235 të ligjit nr. 115/2016, në lidhje me raportin e ILDKPKI-së.

25. Kandidati Vasil Bendo ka paraqitur me shkrim shpjegime dhe dokumente shtesë pranë Këshillit me nr. 818 prot, datë 18.12.2019 dhe nr.1 prot., datë 06.01.2020, si dhe me e-mailin e datës 30.12.2019.

26. Gjithashtu, për këtë rast kandidimi, Këshilli vlerësoi t’i drejtohet me kërkesa për informacion disa institucioneve publike dhe subjekteve private, pranë të cilave kandidati Vasil Bendo ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të kandidatin si: Dhoma Kombëtare e Avokatisë së Shqipërisë (*shkresa nr.709 prot., datë 04.11.2019*), Instituti i Sigurimeve Shoqërore (*shkresa nr.710 prot., datë 04.11.2019*), Drejtoria e Përgjithshme e Tatimeve (*shkresa nr.711 prot., datë 04.11.2019*).

27. Lidhur me të dhënat e kërkuara, Këshilli ka marrë përgjigje me shkrim nga Dhoma Kombëtare e Avokatisë së Shqipërisë (*shkresa nr.480 prot., datë 13.11.2019*), Instituti i Sigurimeve Shoqërore (*shkresa nr.7555/1 prot., datë 12.11.2019*), Drejtoria e Përgjithshme e Tatimeve (*shkresa nr.20296/1 prot., datë 13.11.2019*).

28. Në përfundim të veprimeve dhe procedurave të kontrollit dhe verifikimit, në zbatim të neneve 235, 236 dhe 237 të ligjit nr. 115/2016, si edhe të pikave 76 dhe 77 të Vendimit nr. 4, datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, anëtarja e Këshillit relatores e çështjes ka proceduar me përgatitjen e relacionit përkatës mbi gjendjen e faktit dhe të ligjit të zbatueshëm dhe e ka dërguar çështjen për shqyrtim në mbledhjen e Këshillit.

29. Në zbatim të pikës 33 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, zv/Kryetari ka thirrur mbledhjen e Këshillit duke njoftuar anëtarët për zhvillimin e saj në datën 17.07.2020, ora 13 e 30, rendin e ditës, si edhe duke i bashkëlidhur njoftimit materialet e çështjes. Në rendin e ditës është përfshirë edhe çështja me objekt verifikimin e kandidaturës së z. Vasil Bendo, për vendin vakant në Gjykatën Kushtetuese të shpallur nga Presidenti i Republikës në datën 07.02.2018 dhe rishpallur në datën 27.09.2019.

30. Në zbatim të pikës 34 të Vendimit të Këshillit të Emërimeve në Drejtësi nr. 4, datë 11.03.2019 *“Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë”*, dita dhe koha e zhvillimit të mbledhjes, së bashku me relacionin e përgatitur nga relatori, i është njoftuar kandidatit Vasil Bendo, nëpërmjet postës elektronike zyrtare, në datën 13.07.2020.

31. I njëjti njoftim, së bashku me dokumentacionin e përgatitur nga relatori mbi veprimet e kryera gjatë procedurës së verifikimit, si edhe materiale të çështjes, i janë dërguar edhe Avokatit të Popullit.

32. Për zhvillimin e mbledhjes së Këshillit në datën datën 17.07.2020, ora 13 e 30, rendin e ditës dhe relacionin e përgatitur janë njoftuar edhe subjektet që sipas ligjit ftohen të marrin pjesë në mbledhjet e Këshillit.

33. Dita dhe koha e zhvillimit të mbledhjes, si edhe rendi i ditës janë njoftuar publikisht edhe në faqen zyrtare të Gjykatës së Lartë, në pjesën e caktuar për Këshillin e Emërimeve në Drejtësi.

34. Në mbledhjen e Këshillit, pas relatimit të parashtruar nga anëtari relator dhe shpjegimeve mbi pyetjet sqaruese të drejtuara nga anëtarët e Këshillit, Këshilli dëgjoji mendimin e Avokatit të Popullit lidhur me mënyrën e procedimit të ndjekur për verifikimin e kandidatit Vasil Bendo.

35. Avokati i Popullit parashtroi se ishte dakord në thelb me procedurën e ndjekur për verifikimin e kandidatit dhe ka sugjeruar disa elemente shtesë që duhet të përmbajë në të ardhmen relacioni në lidhje me përcaktimin e kohës së veprimeve (të përfundimit të hetimit prej relatorit apo të komunikimit të gjetjeve kandidatit). Po ashtu, sugjeroi që në drejtim të verifikimit të kriterit ndalues që lidhet me pasjen e pozicioneve drejtuese në parti politike të komunikohet në të ardhmen edhe me KQZ-në.

II. Vlerësimi i Këshillit të Emërimeve në Drejtësi

36. Lidhur me verifikimin dhe kontrollin e integritetit, Prokuroria e Përgjithshme, me shkresën nr. 3078/75 prot., datë 20.01.2020, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Vasil Bendo, duke ardhur përfundimet se:

Subjekti deklaron Vasil Bendo, nuk përfshihet në fushën e veprimit të nenit 2 të ligjit nr.138/2015 “Për garantimin e integritetit të personave që zgjidhen, emërohen ose ushtrojnë funksione publike”.

37. Autoriteti për Informimin mbi Dokumentet e Ish-Sigurimit të Shtetit, me shkresën nr.1599/4 prot., datë 04.12.2019, ka dërguar vendimin nr.764 datë 02.12.2019 pranë Këshillit të

Emërimeve në Drejtësi me rezultatet e kontrollit të ushtruar për kandidatin Vasil Bendo, duke ardhur përfundimet se:

Për z. Vasil Bendo, nga verifikimet e kryera deri tani nuk figuron të ketë materiale në dokumentet të ish-Sigurimit të Shtetit në emër të tij, sipas nenit 29, pika 2 të ligjit nr.45/2015 "Për të Drejtën e Informimit për Dokumentet e ish-Sigurimit të Shtetit të Republikës Popullore Socialiste të Shqipërisë".

38. Shërbimi i Kontrollit të Çështjeve të Brendshme dhe Ankesave pranë Ministrisë së Brendshme me shkresën nr.2419/2 prot., datë 03.12.2019, ka përcjellë pranë Këshillit të Emërimeve në Drejtësi informacionin e kërkuar, të cituar në pikën më sipër, nga ku rezulton se, në lidhje me kandidatin Vasil Bendo:

Nuk figuron i evidentuar për veprimtari kriminale.

39. Drejtoria e Sigurimit të Informacionit të Klasifikuar, me shkresën nr.4021 prot., datë 18.12.2019, ka përcjellë pranë Këshillit të Emërimeve në Drejtësi informacionin e klasifikuar e të përpunuar sipas standardeve ligjore dhe profesionale për këtë kategori informacionesh, të dërguara nga agjencitë ligjzbatuese të cituara në pikën më sipër, nga ku rezulton se, në lidhje me kandidatin Vasil Bendo:

Nuk disponohen materiale implikuese ose kompromentuese për integritetin e figurës së z. Vasil Bendo.

40. Këshilli i Emërimeve në Drejtësi, bazuar në njohjen dhe shqyrtimin e informacionit të dërguar nga agjencitë ligjzbatuese, vjen në përfundimin se, **për këtë kriter**, në zbatim të nenit 236 të ligjit nr. 115/2016, **kandidati Vasil Bendo nuk gjendet në kushtet që mund të sjellin ndalimin e kandidimit.**

41. Për verifikimin e kushteve dhe kriterëve të tjera ligjore të kandidimit, në zbatim të shkronjave "b", "c" dhe "d" të pikës 1, pikës 2 dhe 3 të nenit 7/a të ligjit nr. 8577/2000, të neneve 237 dhe 240 të ligjit nr. 115/2016, si edhe në zbatim të pikave 91-93 të Vendimit të Këshillit të Emërimeve në Drejtësi nr. 4, datë 11.03.2019 "*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*", Këshilli shqyrtoi dokumentacionin e depozituar nga vetë kandidati Vasil Bendo në momentin e kandidimit pranë organit të emërtesës që ka shpallur vendin vakant, shpjegimet dhe dokumentet shtesë të paraqitura nga kandidati mbi kërkesën e Këshillit, si edhe përgjigjet nga informacionet e kërkuara nga institucionet publike dhe subjektet private ku kandidati ka ushtruar funksione publike ose veprimtari private profesionale apo ku gjenden të dhëna lidhur me ushtrimin e detyrave dhe veprimtarinë profesionale të tij.

42. Në lidhje me kushtin e kandidimit të parashikuar nga pika 4 e nenit 125 të Kushtetutës dhe shkronja "b" e pikës 1 të nenit 7/a të ligjit nr. 8577/2000, pra që kandidati të ketë *mbaruar arsimin e lartë juridik, Diplomë e Nivelit të Dytë*, nga dokumentacioni i shqyrtuar rezulton se kandidati Vasil Bendo ka përfunduar studimet dhe është diplomuar në vitin 1976-1980 si Jurist, në Fakultetin e Drejtësisë të Universitetit të Tiranës. Në zbatim të ligjit nr.80/2015 "*Për Arsimin e Lartë dhe Kërkimin Shkencor në Institucionet e Arsimit të Lartë në Republikën e Shqipërisë*", ky lloj arsimimi kualifikohet si arsim i lartë juridik, Diplomë e Nivelit të Dytë. Për rrjedhojë **kandidati Vasil Bendo nuk gjendet në kushtet e ndalimit të kandidimit sipas dispozitave të sipërcituara.**

43. Lidhur me kushtin e kandidimit të parashikuar nga pika 4 e nenit 125 të Kushtetutës dhe shkronja "a" e pikës 2 të nenit 7/a të ligjit nr. 8577/2000, pra që kandidati të ketë të paktën 15 vjet përvojë pune si gjyqtarë, prokurorë, avokatë, profesorë ose lektorë të së drejtës, nëpunës të nivelit të lartë në administratën publike, nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, ndërmjet të tjerave, rezulton se kandidati Vasil Bendo ka ushtruar veprimtari profesionale si:

a) Avokat, për periudhën "01 Shkurt 2012 – në vazhdim", pranë Dhoma e Avokatisë Tiranë.

b) Këshilltar Ligjor, për periudhën "01 Janar 2009 – 01 Shkurt 2012", pranë Gjykatës së Lartë.

c) Administrator dhe ortak, për periudhën "22 Shtator 1999 – 31 Dhjetor 2008", pranë Shoqërisë tregtare "Inter-Office".

ç) Drejtor i Departamentit Juridik, për periudhën "01 Shtator 1997 – 01 Shtator 1998", pranë Këshilli i Ministrave.

d) Këshilltar Ligjor, për periudhën "03 Shtator 1992 – 01 Shtator 1997, pranë Kryeministrit të Shqipërisë.

dh) Jurist-ekspert në Byronë Juridike, për periudhën "01 Qeshor 1985 – 03 Shtator 1992", pranë Këshillit të Ministrave.

f) Këshilltar Ligjor, për periudhën "16 Mars 1984 – 01 Qershor 1985" pranë Ministrisë së Industrisë dhe Minierave Tirana.

g) Jurist, për periudhën "24 Shkurt 1981 – 16 Mars 1984" pranë Kombinatit të Përpunimit të Drurit "Misto Mame" Tiranë.

h) Stazh, për periudhën "16 Gusht 1979 – 30 Prill 1980" pranë Gjykatës së Rrethit Gjyqësor Tiranë.

44. Bazuar në gjetjet e cituara si më sipër, Këshilli konstaton se **kandidati Vasil Bendo ka ushtruar së paku për 15 vjet veprimtari profesionale nga ato të parashikuara si kusht për lejimin e kandidimit nga pika 4 e nenit 125 të Kushtetutës dhe shkronja "a" e pikës 2 të nenit 7/a të ligjit nr. 8577/2000 dhe nuk gjendet në kushtet e ndalimit të kandidimit sipas dispozitave të sipërcituara.**

45. Për sa i përket kushtit të kandidimit të parashikuar nga pika 5 e nenit 125 të Kushtetutës dhe shkronja "c" e pikës 1 të nenit 7/a të ligjit nr. 8577/2000, pra që kandidati të mos ketë ushtruar funksione politike në administratën publike gjatë 10 viteve të fundit nga data e kandidimit, sikurse rezulton nga jetëshkrimi dhe aktet e administruara në dosjen e kandidimit për veprimtaritë e tjera të ushtruara, Këshilli konstaton se kandidati Vasil Bendo nuk ka ushtruar funksione politike në administratën publike (gjatë 10 viteve të fundit para kandidimit). Për rrjedhojë **kandidati Vasil Bendo nuk gjendet në kushtet e ndalimit të kandidimit sipas dispozitave të sipërcituara.**

46. Lidhur me kushtin e kandidimit të parashikuar nga pika 5 e nenit 125 të Kushtetutës dhe shkronja "c" e pikës 1 të nenit 7/a të ligjit nr. 8577/2000, pra që kandidati të mos ketë mbajtur pozicione drejtuese në parti politike gjatë 10 viteve të fundit nga data e kandidimit, nga shqyrtimi i jetëshkrimit dhe të dhënave që rezultojnë nga aktet e administruara në dosjen e kandidimit, sikurse janë korrespondenca me partitë politike, Këshilli konstaton se kandidati Vasil Bendo nuk ka mbajtur pozicione drejtuese në parti politike (gjatë 10 viteve të fundit nga data e

kandidimit). Për rrjedhojë, kandidati Vasil Bendo nuk gjendet në kushtet e ndalimit të kandidimit sipas dispozitave të sipërcituara.

47. Në lidhje me kriterin e parashikuar në shkronjën “d” të pikës 1 të nenit 7/a të ligjit nr. 8577/2000, që kandidati të mos jetë larguar nga detyra për shkaqe disiplinore dhe të mos ketë masë disiplinore në fuqi, nga dokumentacioni i shqyrtuar, përfshirë jetëshkrimin, librezën e punës, shkresa e vërtetime të lëshuara nga organet kompetente të emërtesës etj., që janë të administruara në dosjen e kandidimit, Këshilli konstaton se kandidati Vasil Bendo nuk rezulton të jetë larguar nga detyra për shkaqe disiplinore. Po kështu, nuk rezulton që të ketë masa disiplinore në fuqi. Për rrjedhojë **kandidati Vasil Bendo nuk gjendet në kushtet e ndalimit të kandidimit sipas kësaj dispozite.**

48. Për sa i përket procedurës së verifikimit të pasurisë, në përfundim të veprimeve të kontrollit të ushtruar në zbatim të nenit 235 të ligjit nr.115/2016, të ligjit nr. 9049/2003 dhe ligjit nr. 9367/2005, ILDKPKI-ja, me shkresën nr. 125/25 prot., datë 06.12.2019, ka dërguar pranë Këshillit të Emërimeve në Drejtësi rezultatet e kontrollit të ushtruar për kandidatin Vasil Bendo dhe personat e lidhur me të.

49. Në përfundim të analizës së hollësishme financiare të kryer mbi bazën e gjetjeve të siguruara nga informacionet e dërguara nga institucione publike dhe subjekte private, lidhur me deklarimin e pasurisë dhe interesave private të kandidatit Vasil Bendo, ILDKPKI-ja në raportin e paraqitur ka ardhur në përfundimet se:

- Ka mosdeklarim në Deklaratën e Interesave Private të kandidatit për pozicione të ndryshme në institucionet e sistemit të drejtësisë, të vlerës së shpenzuar për rikonstrukcionin e banesës në Rr. Hajdar Hidri, Tiranë, ku referuar deklarimeve periodike ndër vite rezulton se janë shpenzuar 21.929 USD, 2.880.000 lekë, si dhe 2.500.000 lekë, e konvertuar rreth 7.824.000 lekë, si dhe burimi financiar që është përdorur për kryerjen e këtyre shpenzimeve. Gjithashtu mungon dokumentacion justifikues ligjor (preventiv/situacion punimesh) për punimet e kryera në këtë banesë.
- Kandidati nuk ka deklaruar në Deklaratën e Interesave Private të kandidatit për pozicione të ndryshme në institucionet e sistemit të drejtësisë, sipërfaqen e banesës në Rr. Hajdar Hidri, Tiranë. Mbetet e paqartë sipërfaqja pasi në certifikatën e pronësisë përcaktohet 36 metër katror ndërtesë, ndërsa sipas plan rievimit sipërfaqja është 78 metër katror.
- Ka mungesë burimi financiar për depozitat/llogaritë rrjedhëse në Tirana Bank dhe Abi Bank, të cilat janë hapur gjatë viteve 2003-2004, pasi referuar përgjigjeve të institucioneve nuk rezultojnë të ardhura familjare deri në vitin 2006.
- Mungesë e burimeve financiare për pasurinë e deklaruar në deklaratën e interesave private para fillimit të detyrës 2009 në vlerën rreth 9.952.000 lekë.
- Nuk është plotësuar saktë Deklarata e Pasurisë, pasi kandidati nuk ka deklaruar të ardhurat nga angazhimet në veprimtari private dhe/ose publike deri në datën e dorëzimit të deklaratës së pasurisë dhe interesave private.
- Mungesë dokumentacioni justifikues ligjor, lidhur me të ardhurat e babait të kandidatit të cilat kanë shërbyer si burim për çeljen e depozitës në datën 10.06.2008, në shumën 779.857 lekë.
- Mungesë dokumentacioni ligjor lidhur me burimin financiar të përdorur për blerjen e apartamentit me sipërfaqe 83 metër katror, Tiranë, në vitin 1999 nga Enti Kombëtar i Banesave në shumën 1.375.881 lekë.

- Mungon dokumentacioni ligjor lidhur me të ardhurat e subjektit nga shoqëria Inter Office sh.p.k. për periudhën deri në vitin 2009, ku rezulton se është larguar si administrator dhe ortak i saj.

Si konkluzion:

- deklarimi nuk është i saktë në përputhje me ligjin
- nuk ka burime financiare të ligjshme për të justifikuar pasuritë
- ka mosdeklarim të pasurisë
- nuk ka kryer deklarim të rremë
- subjekti nuk gjendet në situatën e konfliktit të interesave.

50. Këshilli, në datën 10.12.2019 dhe në datën 24.12.2019, në rrugë elektronike i ka kërkuar kandidatit të paraqesë shpjegime me shkrim dhe dokumente shtesë në zbatim të nenit 229 pika 2 dhe 235 të ligjit nr.115/2016, në lidhje me raportin e ILDKPKI-së.

51. Kandidati Vasil Bendo ka paraqitur me shkrim shpjegime dhe dokumente shtesë pranë Këshillit me nr. 818 prot., datë 18.12.2019 dhe nr.1 prot., datë 06.01.2020, si dhe me e-mailin e datës 30.12.2019, me të cilën parashtron në thelb si më poshtë:

- *Ju siguroj se detyra dhe natyra e punës që kërkon për vendin vakant është në përputhje me profilin dhe specializimin tim, pasi kam kontribuar për një kohë të gjatë si këshilltar ligjor në administratën e lartë publike për hartimin dhe oponencën e projektakteve ligjore e nënligjore, kodeve të drejtësisë dhe projekteve kushtetuese fillestare të pasviteve problematike 1990 dhe deri në atë të vitit 1998.*

- *Kam një karrierë pune afërsisht 39-vjeçare si jurist i profilizuar në të Drejtën Administrative. Nuk kam pasur asnjëherë poste politike në administratën publike apo në partitë politike të para dhe pasviteve 1990. Nuk kam pasur asnjëherë procedim penal, dënim penal apo masë disiplinore administrative.*

- *Së pari, ILDKPKI duhej të më kishte ftuar t'i jepja shpjegimet e nevojshme verbale dhe shkresore sepse besoj se është një raport i drejtpërdrejtë me një njeri që vjen nga sektori privat, pas deklarimeve zyrtare të viteve 2009-2012 kur kam punuar si këshilltar në Gjykatën e Lartë;*

- *Së dyti, ILDKPKI duhej të më kërkonte drejtpërdrejt dokumente shkresore plotësuese argumentuese për çështjet e pronësisë që shtron.*

- *Së treti, ILDKPKI-së duhej t'i vihej në dispozicion edhe Jetëshkrimi im, në mënyrë që të mos më shikonte me syrin si "ish-gjyqtar ose ish-prokuror"; Në karrierën time 39-vjeçare si jurist nuk kam qenë asnjë ditë gjyqtar apo prokuror; Kam punuar vetëm në administratën publike shqiptare.*

- *Së fundi, ky relacion shpjegues së bashku me dokumentet suplementare shoqëruese mendoj se duhet t'i dërgohen ILDKPKI-së dhe të rivlerësohen nga nëpunësit civil të atij institucioni që kanë nevojë të maturohen.*

- *Babai im, Leonidha Janaq Bendo, ka lindur në fshatin Barmash të Kolonjës në vitin 1921 dhe në moshën afërsisht 16-vjeçare shkoi në Shkodër për të marrë zanat dhe mori shtatë zanate.*

- *Erdhi në Tiranë rreth vitit 1940, hapi një oficinë prapa Dhomës së Tregëtisë të sotme të Tiranës.*

- *Në vitin 1947 objekti (ndërtesa) e oficinës u shtetëzua dhe babai im u punësua në N.Sh.R.A.K.-un e Tiranës si një themelues, profesionist dhe mjeshter i drejtimit të llamarinës së makinave, saldimit me oksigjen, karrocerisë, patinimit, lyerjes, kolaudimit dhe sigurisë të makinave të asaj kohe.*

- Në vitin 1956 babai im bleu një tokë 491 m² së bashku me një shtëpi qerpici 36 m² në qendër të Tiranës, Rruga e Kavajës, Rr. "Hajdar Hidi" Nr. 9 Tiranë, ku unë banoj që nga moshë 1.5 vjeç e deri sot që mbush 64 vjeç.

- Gjithashtu në vitin 1954 babai im së bashku me tri vëllezërit e tij në Tiranë blenë një pronë në Rrugën e Saraçevë Nr. 15 (ish-Rruga Shinasi Dishnica) e përbërë nga një shtëpi qerpici 2-katëshe dhe truall 253 m² por e regjistruar në hipotekë 238 m². Babai im ka zotëruar ¼ e kësaj pasurie. Banesa është plotësisht e shembur që nga viti 2007, trualli është i lirë dhe i rrethuar.

- Babai im ka dalë në pension në moshën 50 vjeç, 5 vite para kohe për punë të vështirë, por edhe pas daljes në pension, ka qenë shumë aktiv në punë, mjeshër dhe usta, ai ka kryer punë të ndryshme private si para ashtu dhe pas vitit të vështirë 1990.

- Trualli 491 m² dhe banesa 36 m² qerpici ndodhur në Rr. "Hajdar Hidi", Nr. 9 Tiranë, janë blerë nga prindërit tanë në vitin 1956 kur unë kam lindur dhe janë trashëguar prej nesh, nga unë dhe dy motrat e mija.

- Babai menjëherë me blerjen e pronës, me leje ndërtimi të dhënë nga ish-Komiteti Ekzekutiv i K.P. Rrethit Tiranë, pjesërisht me kredi bankare, me ndihmën e ndërmarrjes shtetërore ku punonte (ish-N.SH.R.A.K.), me punën e vet dhe shokëve të tij ndërtoi në pronën e blerë banesën ku unë banoj që nga viti 1958 dhe deri sot.

- Banesa deri në vitin 1989 kishte një sipërfaqe afërsisht 68 m² dhe përbëhej nga dy dhoma, një kuzhinë e vogël, sallon, banjë, verandë dhe një bodrum, konstruksioni me themele guri, mur tulle dhe çati me tjegulla. Në vitin 1989 është bërë një shtesë kuzhinë në krahun lindor në marrëveshje me komshiun dhe sipërfaqja ndërtimore e banesës u bë rreth 86 m², aq sa është edhe sot.

- Mbas vdekjes së babai, u bë detyrueshme një rikonstruksion total i banesës dhe për këto arsye, me leje rikonstruksioni të ish-Njësisë Bashkiake Nr.10 Tiranë, kam bërë një investim në vitin 2010-2011.

- Shpjegoj se shpenzimet e llogaritura për rikonstruksionin e banesës arrijnë në rreth 4.7 milion lekë të reja dhe jo aq sa thuhet në Aktin e Kontrollit, pa përfshirë orenditë e brendëshme që shkojnë në rreth 1 milion lekë.

- Deklaroj se rikonstruksionin e banesës e kam bërë në mënyrë krejtësisht private dhe me sipërmarrës ndërtimor, sipërmarrësi i çatisë, i punimeve elektrike dhe hidraulike, i dritareve duralumini, i dyerve MDF dhe shumë sipërmarrje të tjera, janë private.

- Vlera e banesës mund të llogaritet sipas Vendimit të Këshillit të Ministrave Nr. 132, datë 07.03.2018, ndryshuar me V.K.M. Nr. 168, datë 27.03.2019 "Për metodologjinë për përcaktimin e vlerës së taksueshme të pasurisë së paluajtëshme "ndërtesa", Prona është në Zonën Kadastrale 8380, Njësia Administrative Nr. 10, Zona 10/1 ku çmimi për efekt tatimor për sipërfaqe shfrytëzimi është 145.000 lekë/m², pra shtëpia e rikonstruktuar ku unë banoj me sipërfaqe ndërtimore afërsisht 86 m², kap vlerën 12.470.000 lekë.

- Vlera e truallit në bashkëpronësi me motrat e mia nuk është e stabilizuar me ndonjë vendim të qartë qeverie dhe sipas çmimeve të caktuara në vitin 2015 zona 10/1 e Tiranës ka vlerën 66.969 lekë/m², pra vlera e truallit është 32.881.779 lekë.

- ILDKPKI konstaton se kam patur mungesë të burimit financiar për depozitat financiare të hapura në bankë gjatë viteve 2003-2004 dhe pasurinë e deklaruar në 2009. Dëshiroj të theksoj se të ardhurat e mia dhe të bashkëshortes nuk fillojnë nga vitet 2003-2004.

- Kam filluar punë në vitin 1981 dhe kam shërbyer në institucione të larta dhe ku pagën e kam patur nga më të lartat në sektorin publik.

- Kam marrë pjesë në shumë takime ekspertesh, trajnime dhe konferenca ndërkombëtare të financuara nga organizata si, Këshilli i Evropës, Kombet e Bashkuara, Banka Botërore, OECD-SIGMA, Qeveria Gjermane, etj, ku djeta ditore shkonte në 180 USD/dita, nga të cilat

mund të shpenzoja deri në 80 USD/dita, pjesa tjetër kalonte në fond kursimesh që mbahej në shtëpi.

- Në të ardhurat e familjes time përfshihen edhe të ardhurat e bashkëshortes time nga paga në shtet, që nga viti 1984 kur jemi martuar nuk ka patur asnjëherë ndërprerje pune dhe 20 vitet e fundit ka punuar në Drejtorinë e Përgjithshme të Shërbimit Gjeologjik Shqiptar si nëpunëse civile.

- Me këto shpjegime besoj se argumentohet investimi për rikonstruksionin e banesës dhe hapjen e llogarive në vitet 2003-2004.

- Mendoj se faqja 4 e Deklaratës është plotësuar drejt dhe përcakton realisht të ardhurat për vitin 2019 deri në datën e dorëzimit. Unë kam mbi 7 vjet që nuk bëj deklaram pasurie pranë ILDKPKI prandaj kështu e kuptova dhe e plotësova.

- Babai, pas vdekjes na la si trashëgimi një shumë në vlerën rreth 2.1 milion lekë të reja të cilat u ndane në tresh.

- Burimi financiar për blerjen e apartamentit nga Enti Kombëtar i Banesave në vitin 1999 ka qenë paga në Këshillin e Ministrave, paga e bashkëshortes dhe kontributi financiar modest i babait.

- Për të ardhurat nga shoqëria INTER-OFFICE sh.p.k, shpjegoj se deri në 01.03.2005 kjo shoqëri ka qenë biznes i vogël me një xhiro mesatare vjetore 7 milion lekë të reja. Pas pagesës së tatimit të thjeshtuar, sipas llogaritjeve rreth 25% e xhiros kalonte në fitim të ortakëve që nuk i nënshtrohej tatimit mbi dividendin.

- Të ardhurat vjetore gjatë kësaj periudhe kanë qenë rreth 875.000 leke/vit + paga mujore si administrator mbi të cilën paguhej kontributi për sigurimet shoqërore.

- Pas vitit 2005 kur shoqëria kaloi në biznes të madh, u rrit paga ime si administrator por fitimi ka kaluar në rritje të kapitalit dhe jo në dividend, përveç një vendimi të ortakëve në vitin 2008 me një dividend 592.928 lekë.

- Nuk kam asnjë pronë të paluajtëshme të fituar në mënyrë të paligjshme.

- Nuk kam asnjë pronë të luajtëshme të fituar në mënyrë të paligjshme.

- Nuk kam të ardhura të fituara në mënyrë të paligjshme dhe të padeklaruara dhe nuk kam shpenzime që rrjedhin nga burime financiare të paligjshme e të padeklaruara.

- Nuk kam anëtarë të familjes time që punojnë në punë të zezë dhe të pa deklaruara në organet tatimore.

- Trashëgimlënësit tanë, babai dhe nëna ime, nuk kanë fituar kurrë pronë në mënyrë të kundërligjshme dhe unë e familja ime sot dhe që prej 35 vjetësh martesë, nuk zotërojmë pronë të paluajtëshme trashëgimore të fituar apo pronë të blerë në mënyrë apo burime të kundërligjshme.

- Kam qenë nëpunës i lartë i administratës publike shqiptare dhe kurrë nuk i kam lejuar vetes mundësinë të përfitoj pasuri apo para në mënyrë të paligjshme, ose pa të drejtë ose në mënyrë fitimi korruptiv. Unë i përkas brezit të juristëve administrativë të viteve 1980 që kanë qenë dhe janë tepër të ndërgjegjshëm dhe të disiplinuar në postet publike që kanë patur ndër dekadat e zhvillimit demokratik të legjislacionit administrativ të vendit tonë.

52. Këshilli i Emërimeve në Drejtësi verifikoi përputhshmërinë e të dhënave të deklaruara nga kandidati Vasil Bendo në Deklaratën e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë që ka depozituar pranë ILDKPKI-së, mbi bazën e të cilave ky institucion ka realizuar analizën financiare dhe ka ardhur në përfundimet e tij, në raport me të dhënat që rezultojnë nga informacionet e dërguara pranë Këshillit nga institucionet publike dhe private të treguara në pikën 14 të këtij Vendimi.

53. Mbi bazën e verifikimeve të kryera, Këshillit i rezulton se ka gjetje që tregojnë të dhëna të padeklaruara apo mospërputhje të tyre me të dhënat e treguara në deklaramet e bëra nga kandidati

Vasil Bendo pranë ILDKPKI-së me *Deklaratën e e Pasurisë dhe Interesave Privatë të Kandidatit për Pozicione të Ndryshme në Institucionet e Sistemit të Drejtësisë*.

54. Gjithashtu, Këshilli e vlerësoi të plotë dhe ezaures, sipas kërkesave të legjislacionit në fuqi, hetimin e thelluar dhe analizat e hollësishme financiare të realizuara nga ILDKPKI-ja, sikurse edhe përfundimet e këtij institucioni mbi kontrollin e pasurisë dhe interesave private të kandidatit Vasil Bendo.

55. Për këto arsye, në zbatim të shkronjës “dh” të pikës 1 të nenit 7/a të ligjit nr. 8577/2000 dhe të nenit 235 të ligjit nr. 115/2016, Këshilli vjen në përfundimin se kandidati Vasil Bendo **nuk ka “kaluar me sukses procesin e kontrollit dhe verifikimit të pasurisë së tij personale dhe të familjarëve të tij”**. Për rrjedhojë, në zbatim të nenit 235 të ligjit nr. 115/2016, **ky kandidat gjendet në kushtet e ndalimit të kandidimit për sa i përket verifikimit të pasurisë**.

56. Nisur nga sa analizohet dhe arsyetohet më sipër, bazuar në gjetjet dhe të dhënat e konstatuara gjatë procedurës së verifikimit që rezultojnë nga aktet dhe dokumentacioni që përmban dosja e kandidimit, në interpretim dhe zbatim të ligjit të zbatueshëm për kushtet dhe kriteret e kandidimit për gjyqtar në Gjykatën Kushtetuese, Këshilli i Emërimeve në Drejtësi vjen në përfundimin se duhet të vendoset ndalimi i kandidimit të kandidatit Vasil Bendo, për vendin vakant në Gjykatën Kushtetuese të shpallur nga Presidenti i Republikës në datën 07.02.2018 dhe rishpallur në datë 27.09.2019.

PËR KËTO ARSYE:

Në mbështetje të pikës 1 të nenit 149/d dhe nenit 125 të Kushtetutës, të nenit 7/a dhe 7/b të ligjit nr. 8577/2000 “ *Për organizimin dhe funksionimin e Gjykatës Kushtetuese të Republikës së Shqipërisë*”, i ndryshuar, të pikës 3 të nenit 229, pikës 4 të nenit 235, pikës 5 të nenit 236 dhe pikës 3 të nenit 237 të ligjit nr. 115/2016 “*Për organet e qeverisjes së sistemit të drejtësisë*”, si edhe të shkronjës “b” të pikës 50 të Vendimit të Këshillit të Emërimeve në Drejtësi nr. 4 datë 11.03.2019 “*Për procedurën e verifikimit të kandidatëve për pozicionet vakante në Gjykatën Kushtetuese dhe të Inspektorit të Lartë të Drejtësisë*”, i ndryshuar, Këshilli i Emërimeve në Drejtësi,

VENDOSI:

1. Ndalimin e kandidimit të kandidatit Vasil Bendo, në vendin vakant në Gjykatën Kushtetuese të shpallur nga Presidenti i Republikës në datën 07.02.2018 dhe rishpallur në datën 27.09.2019.
2. Në zbatim të nenit 238 të ligjit nr. 115/2016, ky vendim i njoftohet kandidatit Vasil Bendo.
3. Kandidati Vasil Bendo ka të drejtën e ankimit në Gjykatën Administrative të Apelit, jo më vonë se 5 ditë nga dita e njoftimit të vendimit të arsyetuar.
4. Ky vendim publikohet në faqen zyrtare të Gjykatës së Lartë, në pjesën e përcaktuar për Këshillin e Emërimeve në Drejtësi.

Zv/KRYETARE

Vitore TUSHI

